

欽定熱河志

欽定熱河志卷四十五

圍場一

國家德威遐播，疆索恢宏，木蘭千里，泉甘壤沃，界以崖嶺，亘以周絡。我聖祖仁皇帝因藩部敬獻牧場，肇開靈囿，歲行秋獮。皇上式遵前典，每以八月行圍上塞，六飛于邁，雲合景從，名王左右，躬屬囊鞬，以效馳驅，將忱悃習勞宣愷，意莫隆焉。夫《易》表三驅，《禮》重四畋，雖在盛明，不忘肄武。若今日中外一家，懷柔震疊，獻禽表貉，大小從公，古未有也。謹詳考規制，恭錄綸言御製於簡端，而以宴賞勞還群藩上壽諸典，依次編載，具列于篇。志圍場第五。

聖祖諭旨

康熙六十一年九月，諭議政大臣等曰：『從前曾有以朕每年出口行圍勞苦軍士條奏者，不知國家承平雖久，豈可遂忘武備。前噶爾丹攻破喀爾喀，並侵擾我內地扎薩克至烏蘭布通，朕親統大兵征討，噶爾丹敗走，後又侵犯克魯倫，朕統兵三路並進，至昭莫多剿滅之。今策妄阿喇布坦無端侵犯喀（三）密地方，朕徵發阿爾泰及巴爾庫爾兩路兵進剿，策妄阿喇布坦聞之心膽俱碎，乃遣策零敦多卜等，潛往西藏劫掠毀壞寺廟，土伯特地方已被殘盡。朕又遣大兵前往擊敗策零敦多卜等，復取西藏，救土伯特於水火之中。我兵直抵西藏，立功絕域，此皆因朕平時不忘武備，勤於訓練之所致也。若聽信從前條奏之言，憚於勞苦，不加訓練，又何

能遠至萬里之外而滅敗〔三〕立功乎？爾等諸臣咸宜知之！」

皇上諭旨

乾隆六年，上舉行秋獮之典，將以七月啟行。先是二月，御史叢洞奏：『皇上念切武備，巡幸行圍，誠安不忘危之至意。第恐侍從以狩獵為樂，臣工或以違遠天顏，漸生怠安，所關匪細。方今紀綱整肅，營務罔弛，伏祈暫息行圍，以頤養天和。』奏入。上諭曰：『古者春蒐夏苗，秋獮冬狩，皆因田獵以講武事。我朝武備超越前代，當皇祖時，屢次出師，所向無敵，皆因〔三〕平日訓練嫺熟，是以有勇知方，人思敵愾。若平時將狩獵之事廢而不講，則滿洲兵弁習於宴安，騎射漸至生疏矣。皇祖每年出口行圍，於軍伍最為有益，而紀綱整飭，政事悉舉，原與在京無異。至巡行口外，按歷蒙古諸藩，加之恩意，因以寓懷遠之略，所關甚鉅。皇考因兩路出兵，現有徵發，是以暫停圍獵。若在撤兵之後，亦必舉行。況今升平日久，弓馬漸不如前，人情狃於安逸，亦不可不加振厲。朕之降旨行圍，所以遵循祖制，整飭戎兵，懷柔屬國，非馳騁畋遊〔四〕之謂。至啟行時，朕尚欲另降諭旨，加恩賞賚，令其從容行走，亦不至苦累兵弁。朕性耽經史，至今手不釋卷，游逸二字，時加警省。若使逸樂是娛，則在禁中縱所欲為，罔恤國事，何所不可，豈必行圍遠出耶？朕廣開言路，叢洞胸有所見，即亦陳奏，意亦可嘉，但識見未廣，將此曉諭知之！』

三月，諭直隸總督孫嘉淦曰：『國家武備不可廢弛，朕於本年秋月出口行圍，原以訓練

兵丁，仿古獮狩之禮。昔我皇祖每歲舉行，所經由道路及一切事宜，俱有章程，朕今歲踵行，悉遵舊制。但恐歷年已久，地方官員或借端派累，隨從之人或有恣意需索及強買物件、不按時價者，著總督孫嘉淦不時查參，毋得容隱！」

九月，諭諸王大臣等曰：『朕行圍回京之後，恭讀太宗皇帝實錄，內載：「昔太祖時，我等聞明日出獵，即豫為調鷹蹴毬，若不令往，泣請隨行。今之子弟，惟務出外遊行，閑居戲樂。在昔時無論長幼，爭相奮勵，皆以行兵出獵為喜。爾時僕從甚少，各牧馬披鞍，析薪自爨，如此艱苦，尚各為主效力。國勢日隆，非由此勞瘁而致乎？今子弟遇行兵出獵，或言妻子有疾、或以家事為辭者多矣，不思勇往奮發，而惟耽戀室家，偷安習玩，國勢能無衰乎！」此等流弊，有關於滿洲風氣，是以蒙太宗皇帝諄切訓諭。朕此次行圍，諸王大臣中竟有耽戀室家托故不願隨往者。朕已為姑容，亦不明指其人。夫行圍出獵，既以操演技藝，練習勞苦，尤足以奮發人之志氣，乃滿洲等應行勇往之事。若惟事偷安，不知愧耻，則積習相沿，實於國勢之降替甚有關係。嗣後倘有不知悛改，仍蹈前轍者，朕斷不輕為寬宥。可遍行傳諭諸王大臣及官兵等知之！」』

謹按：行圍講武所以習勞軍士，綏馭群藩，實我聖朝萬年家法。伏讀聖祖成訓，我皇上明諭，合揆同符，蓋行健勵勤、即以持盈保泰，懲文恬武嬉之失，為久安長治之圖。嗣是膚公疊奏，實賴八旗勁旅，敵愾同仇，所以訓厲戎行者，義深遠矣。

圖全場圖



圍場規制

國語謂哨鹿曰『木蘭』，圍場為哨鹿所，故以得名。地在蒙古各部落中。周一千三百餘里，南北二百餘里，東西三百餘里。東北為翁牛特界，東及東南為喀喇沁界，北為克西克騰界，西北為察哈爾正藍旗界，西及西南為察哈爾正藍、鑲白二旗界，南為熱河廳界。圍場外：北為巴林，東為土默特，西為西四旗察哈爾，南則入圍場之路也。圍場四面立界曰柳條邊。自波羅河屯入圍場有二道，東道由崖口入，即石片子也；西道由濟爾哈朗圖入。每歲行圍俱出入崖口。乾隆二十四年建行宮于濟爾哈朗圖，于是車駕行圍由崖口入，則回鑾由濟爾哈朗圖；若由濟爾哈朗圖入，則回鑾由崖口，遂以為例云。

聖祖御製詩

六十一年秋出哨

四集

歲歲經行處，山川照舊時。峰巒不改色，鬢髮已如絲。勝地清涼適，衰年水土宜。非因耽逸豫，實借憩神思。隔嶺疑圍闊，聞聲呼鹿隨。歸營常早歇，撫景自堪怡。行伍原齊備，屏藩任指麾。薄來厚往義，遠近普恩施。

御製詩

入崖口

辛未

朝家重習武，靈圍成自天。匪今而斯今，祖制垂奕年。巉巖圍疊嶂，崖口為之關。壁立衆山

斷，伊遜奔赴川。秋獮常經過，每為遲吟羈。雙峰開霽烟，一水流潺湲。翠葉復黃葩，高低入影妍。去年巡洛伊，伊亦有崖口。三塗及七谷，較此夫何有。一得考功詩，羶薌傳至茲。我為是崖嘆，表章將待誰。

於木蘭作

天文漏分野，地志闕開縣。博覽《山海經》，荒略一二見。上林牟內地，木蘭闢塞甸。中外久一家，敬奉金甌奠。

單于讓牧場，朝家置靈囿。深戒武備弛，於焉習獮狩。崇岡既壇曼，叢樾亦美茂。以故百物滋，取豐留尚富。

霜華霏漠宇，窪棱紺絳斑。蒙茸紫獮裳，八月披曉寒。呦鹿隨哨至，樂此誠忘餐。樂亦不可極，於古戒遊盤。

吳越近江巡，山水信清美。饒復藉人工，未足云觀止。隱現固有時，美善盡無比。獨待表章人，一為宣其理。

宣理理乃昧，紛然起毀譽。不及無名稱，故吾猶古初。劉羸今何有，守禦長城隅。長城更以外，時來習三驅。

綉壁琳琅標，樂動笙簧幽。眺聽欣不凡，發思凌清秋。青山生白雲，雲去山還留。寄此片時興，萬劫高峰頭。

觸緒偶即景，得句恆因心。申命鄒枚侶，染翰賡予吟。清詞出衆表，妙理入細斟。寧無不盡意，秘稿貽知音。

帳殿張雁塞，毳服蒙龍光。嘉賓式燕喜，乳酒湘黃洋。〔五〕錫爵洽衆歡，湛露流霞觴。戒旨非所知〔六〕，古俗猶敦龐。

楓葉續疊峻，楊絲鎖曲隈。動靜無窮觀，知仁有餘樂。佳景四時宜，最宜乃金昊。曷其可久耽，言旋勤政要。

入崖口 壬申

伊遜九轉來遙源

〔伊遜〕即蒙古語所謂九也。

崖口為東奔流湍。重重鎖鑰羅岌垣，壁立萬仞天風寒。地利一夫可

當關，太平時節誰泥丸。清秋按轡凌層巒，駕言大獮朝可汗。控弦騎士數逮千，發蹤指使遵虞官。約束匪嚴亦匪寬，要欲上下同和歡。詎惟從禽事遊盤，于時獵也有道存，聖人家法敬繼旂。

罷獵出崖口

罷獵出崖口，休茲藩部群。踰瞻仍戀戀，歸去各欣欣。山向南來暖，情留北望殷。豐碑讀前作，去歲度崖口得詩，命樹碣崇岡上。緯武要經文。

入崖口作 癸酉

縈紆塞外赴山蹊，霧斂高峰秋色淒。仙境直攀千級磴，雄關誰藉一丸泥。嘒榛石鼠如飛擲，

隱葉山禽不住啼。靈囿天成教習武，往來每為駐驄蹄。

出哨

納稼多完民氣和，往來廿日覺無何。詎貪朔塞連圍樂，且喜山村高廩多。閑卻鷹韝徐駿騎，馱來鹿角簇封駝。惟官賦就權弢筆，近著《後哨鹿賦》，因閒數日未咏。觸緒依然事一哦。

入崖口 乙亥

寒村野郭取次彈，山盤水屋入木蘭。兩峰排闥相關闔，萬林開畫紛黃丹。伊遜之流來西北，橋上青驄催得得。駝裝車載各遵途，快獵非關歌《敕勒》。去秋未此吟鳴鞭，去秋由中關取道幸吉林，未入木蘭，故不經此。今歲秋光如昔年。鏡瀾俯看忽自笑，如何添許星星然。

出崖口作

崖口臨秋季，景光又一新。輜裝載三獲，村落見高囿。潦盡鳴寒瀨，林稀露衆皴。最憐石田熟，茅屋尚多貧。

入崖口 丙子

底須連網結周陞，獵壤神皋控廣輿。自有萬峰作郭郭，天然雙嶂是門閭。入來草木皆仙意，無礙山河只古初。懷遠習勞家法凜，詎因哨鹿每勤予。

入崖口 丁丑

九曲伊遜出峭崖，【伊遜】即蒙古語九數也。是水發源木蘭中，凡九曲而出崖口，故云。巖關秋色正清佳。行時閱武仍於是，舊部新藩率與

皆。緣棧疑從畫屏度，俯溪每聽綠琴諧。常年命駕非耽樂，仁祖鴻模慎永懷。

出崖口 戊寅

廿日木蘭事大蒐，惠遐示度禮粗修。罷圍才出峭崖口，遵路旋過野渡頭。漫戀友群歌悉率，恰欣場圃報登秋。山莊錫宴應聊駐，懷遠寧教愷澤稠。

入崖口 己卯

九曲伊遜

讀作平聲，「伊遜」蒙古語九數也。

水，雙尖崖口山。又將試秋獮，曾未改峰顏。習武朝家重，來王諸部

閑。駝鈴過輜重，活畫翠巖間。

出峭

出峭過巖柴，山川頓爾殊。可耕地無隙，凡山頭崖口，壑間率過。有獲戶多愉。為去聲。喜食衣足，寧詢賦稅輸。

覲光殷父老，莫漫警前途。

入崖口 辛巳

九轉伊遜漲始消，吉驄攬轡渡溪橋。按程也欲輿情愜，習獵從來典制昭。紅點綠林蜀錦織，水淙石激塞琴調。巖葩盡是芬陀利，便爾香山未覺遙。香山亦有崖山，見宋之間詩。

出峭 壬午

出峭登平陸，行行見野莊。千山栖晚稼，一嶺隔秋霜。圍場內已降霜，伊遜谷口以外則無，蓋一嶺之隔也。穫只常年半，較猶

內地強。釜炊賴少濟，慰不抵憂長。

鹿柴

鹿柴護周陞，虞人謹守諸。設聽雉免往，了識谷陵虛。

木蘭各口例用木柵為限，猶不免竄竊，設竟如孟氏言園果七十里，已實占芻蕘，雉免地什之七，且芻蕘、雉免者

必將相爭滋事，久之芻蕘空而雉免絕，又將何以為園。

盡信彼為阱，吾聞亦子輿。輞川又曾有，較此竟何如。

入崖口 癸未

崖口隔年入，獵場間

去聲。

歲移。依然九曲瀉，

崖口蒙古名「伊遜」，「伊遜」者九數也，是水凡九曲而出崖口，故有是名。

越好萬峰披。小試平

原騎，

每入崖口，就平川試行小圍，國語謂之「阿達密」。

無殊大獮規。行營遙在望，蔽野列旌旗。

於木蘭即事雜咏

獵所天開玉塞垠，年年秋令一來巡。若論七十里文圍，十倍過之不礙民。

奮武柔遐祖意深，習勞率衆勵予心。邇來頗益新歸附，執役輪年廁羽林。

迷離莎阪曉霜輕，寥廓秋空每放晴。宜獵固然且宜咏，好山處處有逢迎。

疊林極目渥如丹，初試毳衣迫曉寒。詎是靈臺舛節候，卻緣一嶺過興安。

白露為霜鹿有聲，哨來义角面前呈。鮮肥恰供慈寧膳，勝百圍中射獲情。

秋空大野夕風吹，月色如霜萬帳披。牧馬歇駝聲盡好，少卿當日厭聞時。

文臣日日候和門，分鹿均教以次論。曰勢曰時可無此，想非徒作而從言。

點筆惟言意遇欣，雕蟲那復用心勤。便教獵祭窮工力，寧出相如賦所云。

出哨口，見村居秋成頗佳，詩以誌事

東進由西出，輪年景頓殊。柳條橫野限。

結柳條以為邊限，木蘭盛京圍場皆有之。

楓色隔峰無。火種山皆濯，霜收圍不

孤。行行接民舍，歷歷驗農劬。虎落一家聚，魚鱗薄賦輸。幸逢今歲耳，敢忘去年乎？縱見高困慰，還懷漏釜吁。何非廛民莫，豈曰事遊娛。

柳條邊

甲申

盛京柳條邊，木蘭建一致。彼乃巨界設，此惟據要置。所以限內外，事殊實同意。周遮禽獸山，匪牟耕桑地。麋鹿阱誠甚，雉兔往斯愧。

孟子斥齊圍曰為阱，稱文圍曰同民，其辭皆已甚而害意。木蘭原有盜獸之罪，重亦不過發遣，豈有如殺人之罪之理。然誠使雉兔芻蕘者群往

而不禁，則民將爭占相攻，久而雉兔芻蕘之地，且不可得矣。所謂盡信書不如無書也。

獵罷出崖口，柳條尚餘翠。守吏邊外迎，

出柳條邊，則掃除皆地方有司董之，非圍場章京之事矣。

孰不

遵茲制。猶然上古風，示此結繩治。

出哨

出哨歷山田，納稼率已畢。町疇圍場間，崇墉積一律。往歲霜降早，晚蕎或致失。今歲霜降遲，收蕎倍堅實。隴蜀望全副，索陶葺廬室。不飢自鮮盜，村村樂寧謐。椎髻蓬頭輩，迎蹕里門出。爾我誠何修，幸茲遇豐吉。

入崖口

乙酉

九曲轉羊腸，

伊遜之水由崖口出，「伊遜」蒙古語九數也。是河發源圍場中，凡九轉而至此，俗又謂之羊腸河。

崖口實扼要。於天法漢橫，於地象河繞。孕育

關靈境，富有供獵校。詰戎具深意，祖武敢弗劬。是時正快霽，紫翠繪萬峭。舊藩及新附，執役咸如約。撫此益戒慎，詎曰斯尋樂。

出崖口

圍期減兩日，圍期率以廿日為度，茲欲速旋熱河請安，故減兩圍。

百里更偷程。向例東入西出，今歲仍由東出，以程近百里也。

圖展衷懷切，兼紓慈念縈。武

謨良具藏，農物幸豐成。南望山莊近，仍馳進鹿倅。

以出哨遺額附福隆安先馳至山莊問安，并進圍中所獲鹿。

出崖口

丙戌

獵返循流下，峰形九轉鉞。

伊遜水九轉而出崖口，水九轉則峰亦隨之。『伊遜』蒙古語謂九也。

圍期仍致減，

圍場歲以二十日為期，昨歲因皇太后駐蹕山莊，急欲旋程問安，減圍兩日，今年仍

循例減四圍云。懸念欲因申。邊限綠柳在，

今歲秋暄異常，柳條邊尚餘綠色。

途登黃土新。

邊以內皆草地，以外地方官始修路。

沿觀深慰者，原復見

高圉。

熱河一帶夏雨稍缺，深廬秋成或減，茲圍場畢穫，沿村露積充盈，仍屬中豐景象，足慰殷懷也。

入崖口

丁亥

溯源九曲水，

崖口蒙古名伊遜喀卜齊爾，『伊遜』者九數，『喀卜齊爾』者崖口，是地水凡九轉，因以得名。

扼要兩崖山。地限神仙境，天開虎豹關。錦屏圍

匝匝，琴峽瀉潺湲。小獵宜新霽，

是日登程逢陣雨，入崖口即晴。

諸藩喜動顏。

入崖口

丁亥

水抱山環歷幾重，獵場出便閱村農。塞田節令先一月，納稼全疑屆孟冬。

詰戎聊寓習威儀，往不遷延返不遲。急欲山莊申定省，近年每復減圍期。

入崖口

戊子

壁立幾千仞，縈回九曲流。笙竽吹謖籟，錦綉繪清秋。過峽得寬甸，小圍例試蒐。警〔七〕麇

一發中，進崖口日，例布小圍，適一麇逸至，親發矢殪之，因郵進皇太后以佐甘旨。馳進命官郵

入崖口 庚寅

崖口入圍場，川圍小試張。入崖口後，例于平川先試小圍，次日方于山中佈大圍。野流左復右，塞樹綠兼黃。見獵心猶喜，少年

習未忘。然今知鄭重，弗亟驟龍驤。

出哨

出哨坐輿行，自京師啟行日乘馬，圍畢出哨乃乘輿。今歲有勦自啟行即以乘輿者，未從其請也。例然不欲更。棉披滿谷暖，玉積數峰晴。散遣北藩

騎，評量秋讞情。每歲此際，乃閱秋審冊時，人命所系，不敢不審。圍場一再減，所獲尚豐盈。

入崖口 辛卯

河非亦九曲，是處河名伊遜，蒙古語九數也。自發源處九曲而出崖口。地險設雙崖。秋景依然好，小圍按例排。甫入木蘭境，例試平川小圍，次日乃大獵。馬調

鷹足怯，鷹攫雉毛筴。十里羶廬近，拈吟正復佳。

出哨

哨裏今秋暖，峭寒出哨逢。化工具神運，慈愛有殊鍾。筑奏風鳴樾，畫張雪積峰。是日微雪。行宮原

避冷，拈咏得從容。

入柳條邊 癸巳

盛京柳條邊，延袤數百里。木蘭柳條邊，長無半里耳。彼於平地此於山，每因谷口為植援。

事半功倍聊示禁，遮羅崇嶺原周千里如雄關。木蘭周千餘里，本喀爾沁、敖漢、翁牛特諸部地，康熙年間，其王公等以地進獻，遂為圍場，并非奪民之產。而近省流民至者不可不防其墾佔，每

於邊界依谷口植柳為援，以示限制，而非申以厲禁，人自不敢潛越耕牧之法，誠盡善也。朝家習武有常例，非牟民產奪耕地。流來雁戶反侵佔，不可無

斯為限制。春柳青青秋柳黃，入邊咫尺即圍場。平原策馬小試獵，非關心喜應自強。

入崖口 甲午

柳條邊界植援堵，九曲伊遜讀作平聲。又溯之。排闥兩峰錦與綉，張屏四面畫兮詩。懸流水響平流

寂，遠望山高近望卑。豈不常年熟經歷，一回到別一興思。

入崖口 乙未

源溯伊遜平聲，那藉航，野橋度騎妥而康。雙峰畫意興詩思，八月今時即昔光。例試小圍平甸合，

用三四百人于平甸列小圍，國語謂之「阿達密」，每入崖口即行之。仍驅吉駿六鈞良。一鷹一箭無多獲，近崖口獸尚少，是日只射一箭，即中一鷹。適接軍書便賜將。

駐行營後，適阿桂等奏至，現已合圍，勒烏圍指日可克。既批答諭示，即以所射之鷹分賜阿桂、豐昇額、明亮，俾均愜惠，且因初圍獲雉，為成功獲醜之兆。

出哨

此進還此出，人情率習常。伊瑪圖、卜克嶺皆可出哨，但由彼二處行則多一兩程，故人皆願仍由伊遜之路而出，遂亦從之。向南因漸暖，白露未為霜。九月尚

遲穫，往歲出哨則收穫已畢，今年節遲，故尚有未穫完者。千村始築場。雨滋弗種麥，昨沾雨，而北地候寒，不可種秋麥，農家但翻犁為來歲之計耳。翻垞總農忙。

入崖口 丙申

伊水崖口纔五渡，伊遜崖口乃九回。伊遜水自源頭至此凡九曲，因得名，「伊遜」蒙古語謂九也。木蘭行圍率由入，壁立萬仞一綫

開。一夫當關萬夫退，年年秋獮慣往來。成功將士群扈蹕，金川險問〔八〕倍此哉。不翼而飛

附而上，堅礪林立無弗摧。既喜既懼既憐憫，身異爾勞心實陪。

木蘭雜咏 丙申

修獮行秋令，憑輿避曉涼。向至木蘭從無乘輿之事，近因余春秋已逾六十，數年來自行營至看城，始乘肩輿以避曉涼，至上圍則仍乘馬。臂雖病猶勉，心不息斯強。扈

此舊新部，內扎薩克蒙古王公、台吉，及輪流入覲之士，爾扈特年班，回部伯克等，並扈從行圍。非他左右王。孫曾慎聰聽，家法莫教忘。

習武將柔遠，未當廢以偏。往還期廿日，自八月十六日啟鑾至九月初八日回蹕熱河，計達侍聖母僅二十一日，然越數日即遣御前侍衛馳至山莊請安，并以親射之鹿麕等恭進。溫清闊

高年。遞驛恆知豫，射生時進鮮。前茲原不覺，進〔九〕歲每情牽。

草淺獸肥候，非春合是秋。當塗言豈當，魏文帝《典論》謂「歲之暮春，和風扇物，弓燥手柔，草淺獸肥」云云，其言非知獵者。蓋春草雖淺而獸不能肥，必待秋深草枯，蕪原平淺，方堪馳騁，

而獸亦至此時乃肥碩。至于弓力尤須風高始勁，若春多陰雨，弓安得燥乎。司馬諫難由。射祇勝弓弱，馳非下阪修。通年因臂痛，不能挽強，而獸至猶常命中，但不似向日之馳射峻阪耳。天

然景如繪，亦每有詩酬。

孔有其祁類，鹿麕麕射〔王〕麕。德德紛上塞，颼颼鄙西京。直闖帳棚入，生搏僕役爭。獻禽

署閣部，翎褶果循名。大學士于敏中於行帳中獲活鹿一以獻，因今年新賜以雙眼翎黃褶，故戲及之。

等城近咫尺，尖營及看圍城，俗皆謂之「等城」，蓋因等候得名。曉往便傳餐。調鼎或親視，廚盤協衆歡。每遇看城傳膳之日，親視調和湯飯，並盤列煮羊，賜御前大臣、侍衛及扈

從行圍之舊藩、新部諸王、公、台吉等早餐，衆皆歡欣果腹。因之悟飽煖，寧即忘飢寒。設曰大烹養，惟期戎索安。

玉塞秋行旅，徐家畫不如。《石渠寶笈》有徐黃《關山行旅圖》。林疏風拂葉，嶺峻騎牽輿。肩輿上山，繫繩杆下，令侍衛騎馬在前，分左右拽引，以減牽輿校尉之勞。

布帳開山市，牛車趁晚墟。入宵景更好，星野朗安居。

入崖口 己亥

仲秋入崖口，九曲溯雲源。又值行圍候，毋忘家法原。兩年閱瞬息，小獵習囊鞬。初入崖口，必先小試行圍，予亦

親御囊鞬，遇鹿輒射之，以次日即有圍場，預為演習也。試看南流水，動中不動存。

入崖口小獵作

辛丑

我昔伊水遊崖口，無過即景吟數首。木蘭行獵崖口經，習武家法惟敬承。以此較彼輕重擬，我意在此不在彼。去年大慶因罷圍，今歲依例秋獮舉。通閨林凋塞草黃，鷹眼疾馬蹄輕矣。駐營平甸試小獵，三鷹連中衆忭喜。臂病兼之逾古稀，自揣不謂能如是！斯實宿學所致然，可以絜矩於萬理。

出鹿柴門

門經鹿柴總肩輿，

向年出入鹿柴門率乘馬，自己亥始乘肩輿，而圍中仍騎射如常云。

歲過古稀應是如。遵養因圖理幾政，自強寧祇在佃

漁。筐筐率已大娛衆，弓馬原仍未廢初。六十年來於此矣，

余自十二歲恭隨皇祖木蘭行圍，自乾隆辛酉後敬承家法，歲以為常。閱今六十年矣。

靜思

一瞬閱居諸。

木蘭雜咏

壬寅

木蘭皇祖幸高年，繩武而今勵佛肩。設以憲書論甲子，臺然中更益悽然。

進圖〔十二〕崖口路從西，今歲迤西雨澤稽。以此林中鹿遊少，尋思豈為獲禽兮？

馬卿諫失詰戎訓，文帝馳忘馭朽篇。執兩由來在斟酌，用中亦欲達經權。

隨獵諸藩舊與新，有宜左右日相親。思量致此非容易，祖德勤承告後人。

出鹿柴門

西進今年向東出，伊遜平聲仍此渡溪河。往還廿日纔一霎，仲季今秋消幾多。自是龍沙為戶闥，